

Na području općine Lukavac u predhodna dva dana vrijednost sumpordioksida konstantno je bila iznad granične vrijednosti, pa je Ministarstvo prostornog uređenja i zaštite okoliša TK jučer proglasilo epizodu uzbune za područje općine Lukavac.

„Znači imali smo situaciju da za dva predhodna dana smo imali 3 sata uzastopna koja prekoračuju granične vrijednosti tako da to je ona crvena zona kako je mi obilježavamo i po bojama na našoj web stranici, tako da su se ispunili uvjeti za proglašenje epizode, mi smo epizodu proglasili“, izjavio je za RTV Slon Goran Mišić, pomoćnik ministra za zaštitu okoliša i prirode TK.

Prema mjerenju koje vrši Ministarstvo prostornog uređenja i zaštite okoliša TK-a zagađenost zraka koja prelazi granice normale u Lukavacu javlja se samo u posljepodnevnim satima u periodu od 13 do 17 sati.

„Samo je taj period to je specifičnost ovaj puta samo u tom periodu je zagađen zrak a sve ostali dio dana i noći je čist zrak po svim parametrima pa i sumpordioksid ovdje govorimo sada o sumpor dioksidu“, ističe Mišić.

Iako je lijepo vrijeme i povoljna meteorološka situacija, te iako individualna kućna ložišta još uvijek nisu u 100 postotnom kapacitetu počela koristiti kotlovnice, ipak je došlo do proglašenja epizode zbog zagađenosti zraka. Postavlja se pitanje ko su zagađivači?

„Ovdje možemo reći da je uzrok nešto drugo znači vjerovatno je uzrok neki od pogona i postrojenja većih koji se nalaze na području Općine Lukavac koji spaljuju ugalj ali da bi mogli to da kažemo ko je trebat će inspekcija da to utvrdi“, kazao je Mišić.

U ljetnom periodu ovo Ministarstvo je izdvojilo određena sredstva za toplifikaciju i širenje mreže daljinskog grijanja kako bi se smanjio broj korisnika individualnih kućnih ložišta koja su godinama označavani kao jedni od zagađivača zraka i konstantan izvor aerozagađenja. No, još uvijek je prisutan problem većih zagađivača koji još uvijek ne ispunjavaju uvjete iz okolišne dozvole koju izdaje Federalno ministarstvo a koje se odnose na konituirano praćenje velikih zagađivača.

„Da imamo takav recimo monitorig njihovih emisija onog što oni ispuštaju a oni su u obavezi da naprave takav monitoring mogli bi dobiti odnosno sad da kažemo ko je uzrok odnosno da li je neko od tih većih zagađivača postrojenja i pogona uzrok ovakvog zagađenja“, dodaje Mišić.

Ministarstvo prostornog uređenja i zaštite okoliša TK-a je u predhodne tri godine izdvojilo dodatna finansijska sredstva za toplifikaciju Tuzle, Lukavca i Živinica. Za područje općine Lukavac obezbjeđena su dodatna sredstva u iznosu od milion i po KM. Kako nam je kazano iz Ministarstva prostornog uređenja i zaštite okoliša TK-a ove godine u toku je implementacija projekata toplifikacije i trebala bi biti završena do početka iduće godine.



BiH; Većina građana još nije pustila u pogon kotlovnice, ko su onda zagađivači u Lukavcu?

Izvor: rtvslon